

Cerimonie vinars ai 15 di Jugn a Palaç Florio
CORS DI LENGHE FURLANE,
LA UNIVERSITÂT E CONSEGNE I ATESTÂTS
Cuarde edizion dai cors di “marilenghe” destinâts
ai dipendents de aministrazion publiche

Si consegnaran **vinars ai 15 di Jugn, a misdì, inte sale dal Consei di Palaç Florio, in vie Palladio 8, a Udin**, i atestâts di partecipazion ae cuarde edizion dai cors di lenghe furlane, prontâts dal Centri interdipartimentâl di ricercje su la culture e la lenghe dal Friûl (Cirf) de Universitât dal Friûl. A cjaparan part ae cerimonie il retôr Furio Honsell e la direttore dal Cirf, Piera Rizzolatti. Si previôt l'intervent dal president de Societât Filologjiche Furlane, Lorenzo Pelizzo, e dal vicepresidente de cooperative Serling, Antonio Buiani, che a àn colaborât ae realizazion de iniziative.

La iniziative e je stade inmaneade cui fonts de leç 482/99 su la tutele des minorancis linguistichis storichis. I cors, gratuits e su cinc nivei, a son destinâts ai dipendents des aministrazions publichis, ma dut câs a son vierts a ducj i interessâts tant che uditôrs. L'obietîf dai cors al è chel di dâ continuitât di bande dal Ateneu ae formazion linguistiche di meti in vore tal ambient lavoratîf, e in particolâr, intai ents publics.